



Elfte Joorgang

Fasnacht 2008

## Die Gsalzene

Dr Dragan, Zlatko, Branko, Dino und dr Sacha sinn derbyy  
Goran, Mladen, Miroslav und Mirko mälde sich au glyy  
Hälf alle eerenamtligg bi dr Euro 08 mit  
Wil's fyr jede wo dert schafft e Trainerhose gratis gitt

Dr scheeni Piero Esteriore kunnt vom Laufedääli häär  
Dä Figaro gwinnt Frauehärze, macht uns Männer s' Lääbe schwäär  
Dr Grund isch nid si Gsang, si Aazug und si haisse Mafiahuet  
S' isch die feminini Aart – so wie n'er yybargiere duet

D' Migros bietet nei e tolle Auti-Panneservice aa  
Mir hänn das abonniert und glyy drnoo e glaine Notfall ghaa  
S'M-Budget-Pannefaarzyyg kunnt – dr Chauffeur said nid emool «Tschüss»  
Sondern frogt uns grad als erschts: «Ihr Heere hänn dr Cümülüs?»

«Äh mis Mami äh hätt gseit äh» blauderet si wiene Binggis  
«Äh, ich find das alles äh so lässig» lallt s' Martina Hingis  
Zem so syydig kenne schwaffe muess si nid emool vyyl biffle  
Sondern numme s' Bulver us dr Zuger Gschirrmachine schniffle

Abfallbäärg, Vandalismus, Alkohol und Schleegerie  
Die EURO 08 lot e mänge vor Entsetze lut uffschreie  
Doch als greeschti Soorg duet unsri Fraue fascht in Waansinn dryybe  
Dass im St. Jakobs-Park d' Boutique und d' Schuelääde gschlosse blyybe

D' Schütteler vom FC Thun hänn diggi Boscht vom Gricht biikoo  
Si haige s' Thema «Mannschaftsdeggig» dismol allzu wertlig gnoo  
Wäge Unzuerächtnigsfähigkait isch d' Aaklag schnäfl vom Disch  
Denn wär nid uff «3» ka zelle weiss au nid was «16» isch

Kuum sin d' EM- Gruppe usgloost dresche d' Schwooobe hooli Phrase:  
«Unsre Gegner sinn Versager, Mensch, die putze mir vom Rasel!»  
Drby sott die doch wisse, dass fir si nyt resultiert  
Wenn ebbis drmit aafoot, dass me z' Eeschtryych imarschier!  
Aber hit sin die Germane vilicht doch no besser draa  
Doomools hänn si jo e Eeschtryycher als «Bundestrainer» ghaa

Will dr Köbi Kuhn in letschter Zitt männg gspässigs Zyyg vrzellt  
Hett me im als erschti Hilf dr Adrian Knup zer Syte gstellt  
Und d' Moral vo dere Gschicht duet allne Bebbi-Seele guet  
Pro Zircher bruuchts e Basler wo nen rund um d' Uur bedreue duet

## Monschternväs

Pseudostars vo Nooch und Fäärn  
Streeme uff d' Laiebihni z' Bäärn  
Kuum aine weiss, um was es goot  
S' Stigg haisst «Waal in Bundesroot»!

Wichtigtuere, Intrigante  
Vrschweerer, schlächti Komeediante  
Und das Ensemble – s' hett uns gsträält  
Hämmer au no sälber gwäält!

D' Genosse Fehr und Hämmerli  
Schmüesele im Kämmerli  
Und d' Liebesfrucht vo däane Zwäärg  
Isch e Schlümpfli us de Bäärg

Dr Schwaller und dr Darbelley  
Hänn sich als Hauptdarsteller gsee  
Wäggsle nach Gluscht und Luune d' Syte  
Empfääle sich als Transveschтите

D' FDP-Obbortunische  
Sinn aimool mee numme Statischte  
Hänn an de Kittel Ettigette  
Druff stoot: «Blocher-Marjonette»!

E Langhoordaggel vo de Griene  
Stellt sich zer Waal und landet niene  
Me hett en rassig abserviert  
Drzue boliddisch kompostiert

Dr Staalhelmdrääger Chäschpi Baader  
Mit sim rächte Kampfgeschwader  
Daibelet wie s' Rumbbelstilzli  
Noch ere Iberdosis Pilzli

D' SVP ka me vrdryybe  
Aaber dr Stallgruch däa wird blyybe  
Zmindescht ains isch garantiert  
Dr Gaissbogg Zottel isch kaschriert

D' Schlacht isch gschlage, s' Schlümpfli gwäält  
Aaber me gspyyrt, dass eppis fäält  
Me sott se no – dodraa wird's ligge  
Uff schnällschtem Wääg zem Coiffeur schigge

Die Intrigantestadel-Gschicht  
Zaigt: In Bäärn isch s' Niveau schlicht  
S' gitt nur al Wääg us däare Noot  
Die Gsalzene in Bundesroot!